

Mme Mamoeng o Thabisa Nkgono



Pale ka Joan Rankin

Ditshwantsho ka Tamsin le Natalie Hinrichsen

Tsohle di qadile mohlang Mme Mamoeng a etsang botlolo ya jeme bakeng sa letsatsi la tswalo la Nkgono Mamoeng. Yaba Ntjhanyana Beka o fumana balunu ya hae e ntle e bolou. O ne a batla ho e fa Nkgono bakeng sa letsatsi la hae la tswalo.

Mme a pepa Ntjhanyana Beka ka kobo ya hae e bonojwana. Yaba o rwala botlolo ya jeme hloohong mme ke elwa a hwanta ho ya tlung ya Nkgono Mamoeng.

Balunu ya Ntjhanyana Beka e ne e ntse e re *bobbity-bob* mme meqathatso ya Mme e ntse e re *phaqa-phaqa, phaqa-phaqa* ho theosa tselana e lerole ho fihlela a kopana le Siphho a tswa lebenkeleng la Tip-Top. “O ya kae, Mme Mamoeng?” ho botsa Siphho.

“Nna le Ntjhanyana Beka re ya ha Nkgono Mamoeng. Ke letsatsi la hae la tswalo kajeno.” ho araba Mme.

“Ke reketse Nkgono Mamoeng pakete ya ditjhipisi tsa ditapole. Na le nna nka tla?” ha botsa Siphho.

“Ehlile,” Mme a bososela mme ba tsamaya kaofela mmoho.

Pakete ya ditjhipisi tsa ditapole tsa Siphho e ne e ntse e re *kekere-kere, kekere-kere*, Balunu ya Ntjhanyana Beka e ne e ntse e re *bobbity-bob* mme meqathatso ya Mme e ntse e re *phaqa-phaqa, phaqa-phaqa* ho theosa tselana e lerole ho fihlela ba fihla ha Mong Chapalala, ya neng a ntse a fepa dikgoho tsa hae.

“Le ya kae?” yaba o a ba botsa.

“Re ya ha Nkgono Mamoeng. Ke letsatsi la hae la tswalo kajeno,” ha araba Mme.

“Ke na le kgoho e nonneng bakeng sa Nkgono Mamoeng. Na le ka mo fa yona?” ha botsa Mong Chapalala.

“Ehlile,” ha rialo Mme a kgwaela kgoho ka lehafing mme yaba Mme, Ntjhanyana Beka le Siphho ke bale ba hwanta.

Kgoho e nonneng ya nna ya re *kooko, koko, kooko*, pakana ya ditjhipisi tsa ditapole tse romotsehang ya nna ya re *kekere-kere, kekere-kere*, Balunu ya Ntjhanyana Beka yona ya nna ya re *bobbity-bob* mme meqathatso ya Mme yona ya nna ya re *phaqa-phaqa, phaqa-phaqa* ho theosa tselana e lerole ho fihlela ba fihla lebenkeleng la ho baka la Mof Makabelo.



“Re lokela ho rekela Nkgono kuku ya letsatsi la tswalo,” ho rialo Mme. Ba kena ka hare. Tshepe ya monyako ya re *kete-kete-kete*. “Dumela, Mof Makabelo. Na o ne o tseba hore kajeno ke letsatsi la tswalo la Nkgono Mamoeng?”

“Eya bo,” ho rialo Mof Makabelo. “Ke mo baketse kuku e ikgethang, empa nke ke ka kgona ho siya lebenkele feela. Na le ka tsamaya le yona la mo isetsa yona?”

“Ehlile,” Mme a dumela, empa ho ne ho ena le bothata – Mme o ne a hloka matsoho a mabedi ho nka kuku eo. Kahoo, a etsa leqheka. A bea kgoho e nonneng hodima botlolo ya jeme eo a e rwetseng hloohong. Jwale o ne a se a ena le matsoho a mabedi ao a ka nkang kuku ya letsatsi le ikgethang la tswalo. Yaba Mme, Ntjhanyana Beka le Siphon ke bao hape ba hwanta ho tswa le mating le reng *ting-a-ling*.

Eitse ha Ntjhanyana Beka a utlwa monko wa kuku a tsetsela,
“Nnate-nate, nnate-nate.”

Kgoho e nonneng ya re *kooko, koko, kooko*, pakana ya ditjhipisi tsa ditapole tse romotsehang ya nna ya re *kekere-kere, kekere-kere*, balunu ya Ntjhanyana Beka yona ya nna ya re *bobbity-bob* mme meqathatso ya Mme yona ya nna ya re *phaqa-phaqa, phaqa-phaqa* ho theosa tselana e lerole ho fihlela ba kopana le Valecia.

“Le ya kae, kaofela ha lona?” ha botsa Valecia.

“Re ya ha Nkgono Mamoeng. Ke letsatsi la hae la tswalo,” ha hlalosa Siphō.

“Ke na le sehlopha sa dipalesa mona bakeng sa Nkgono Mamoeng. Na le nna nka tla le lona?” ha botsa Valecia.

“Ehlile,” ha rialo Mme mme bohle ba hwanta ba tsamaya.

Sehlopha sa dipalesa tsa etsa hore Valecia a ithimole, “*Heee! Heee-thiyaaaa!*”

Kgoho e nonneng ya re *kooko, koyiko, kooko, koyiko*, pakana ya ditjhipisi tsa ditapole tse romotsehang ya nna ya re *kekere-kere, kekere-kere*, balunu ya Ntjhanyana Beka yona ya nna ya re *bobbity-bob* mme meqathatso ya Mme yona ya nna ya re *phaqa-phaqa, phaqa-phaqa* ho theosa tselana e lerole ho fihlela ba bona Mong Sithole a ntse a peta tshimong ya hae ya meroho.

“Le lebile hokae kaofela ha lona, Mme Mamoeng?” Mong Sithole a botsa.

“Re ya ha Nkgono Mamoeng. Ke letsatsi la hae la tswalo,” a araba.

“Ke na le teroli e tletseng meroho bakeng sa hae,” ha rialo Mong Sithole. “Na ebe le ka mo fa yona?”

“Ehlile,” ha araba Mme.

Empa jwale Mme o ne a ena le BOTHATA bo boholo – ho ne ho ena le dintho tse ngata tseo a lokelang ho di nka! O ile a tlameha ho nahana leqheka.

Pele, a qala ka ho theola Ntjhanyana Beka ka mokokotlong mme a pepa kgoho e nonneng ka kobo e bonojwana. Ntjhanyana Beka a **BOKOLLA!**



Yaba Mme o bea kgoho e nonneng hodima teroli mme a pepa Ntjhanyana Beka ka kobo e bonojwana. Ntjhanyana Beka o ne a thabile mme le kgoho e nonneng e ne e thabile haholo hobane e ne e kobola meroho kaofela e moo. Empa Mme o ne a sa thabiswa ke sena kahoo a bea kgoho e nonneng hloohong ya Valecia. Masiba a ile a tsikinyetsa nko ya Valecia mme a etsa hore a ithimole le ho feta, “*HEEEE-THIYAAAAA!*”

Valecia o ne a sa thaba. Kahoo Mme a nka kgoho e nonneng a e bea hodima hlooho ya Siphon mme a mo fa dipalesa tsa Valecia hore a di tshware. Jwale Valecia o ne a se a sa tshwara letho ka matsohong a mabedi mme a ka kgona ho tshwara kuku. Mme Mme a ena le matsoho a mabedi a sa tshwarang letho hoo a neng a ka kganna teroli. Bohle jwale ba ne ba thabile yaba ba kena tseleng ho ya ha Nkgono Mamoeng.

Mabidi a teroli a nna a re *kikiri-kiri, kikiri-kiri*. Valecia o ne a ena le aesenshuka e tswang kukung marameng a hae kahoo leleme la hae le ntse le re *laqa-laqa-laqa*. Ntjhanyana Beka o ntse a honotha, “Nnate-nate, nnate, nnate-nate.” Kgoho e nonneng ya re *kooko, koyiko, kooko, koyiko*, pakana ya ditjhipisi tsa ditapole tse romotsehang ya nna ya re *kekere-kere, kekere-kere*, balunu ya Ntjhanyana Beka yona ya nna ya re *bobbiti-bob* mme meqathatso ya Mme yona ya nna ya re *phaqa-phaqa, phaqa-phaqa* ho theosa tselana e lerole ho ya fihla tlung ya Nkgono.

Mme a kokota monyako o ka pele. Siphon a letsa molodi. Valecia a hoeletsa. Empa ho ne ho se KARABO. Mme a sututsa lemati la ka pele a le bula mme bohle ba kena ka tlung. Empa ho ne ho SE NA MOTHO MOO. Ba sheba ka kitjhining – HA HO MOTHO. Ba sheba ka phaposing ya ho robala – HO SE MOTHO. Ba sheba hohle. Ebe Nkgono o kae?

Mme a re, “Ha re qaleng ka ho pheha mohlomong Nkgono o tla fihla.”

Yaba bohle ba etsa jwalo – bohle ntle feela le Ntjhanyana Beka. Yena a dula hodima tafole ka kitjhining haufi le fensetere mme a sheba ka ntle ho fihlela a bona Nkgono a theosa ka tsela tlaselase qetellong ya leralla le moepa.

“Nkgono! Nkgono!” a hoeletsa. Bohle ba sheba.


“NKGONO! NKGONO!” bohle ba hoeletsa mmoho. “NKGONO!”

Tlaselase leralleng le moepa Nkgono a re, “WEE WEE WEE. Ho na le motho ya mpitsang. Jwale nke ke ka kgona ho ya mabenkeleng ho ya reka dijo tsa mantsiboya bakeng sa letsatsi la ka la tswalo.”

Nkgono a thinya mme a kgutlela morao a nyolosa leralla. Diselipara tsa hae di ntse di re *shwaa-shwaa*, *shwaa-shwaa* tselaneng e lerole. Qetellong a fihla lemating le ka morao. Yare ha a le bula bohle ba qala ho mminela pina ya letsatsi la tswalo.

Tafoleng ho ne ho ena le phae e entsweng ka meroho le ditarete tsa jeme tseo Mme a neng a di entse, mahe a sa tswa behelwa a tswang kgohong e nonneng, kuku e ikgethang ya letsatsi la tswalo le ditjhipisi tsa ditapole tse romotsehang. Tafole e ne e kgabisitswe ka dipalesa le balunu e ntle e bolou ya Ntjhanyana Beka.

“LENA KE LETSATSI LA KA LA TSWALO LE BILENG MONATE KA HO FETISISA!” ha rialo Nkgono. O ne a hlile a tseba, hobane Nkgono o ne a se a kile a eba le matsatsi a tswalo a ka bang mashome a robedi kapa a robong a tlileng pele ho lena!



IQAPELE!

- Ngola lenane la dintho tsohle tseo batho ba paleng ena ba di fileng
- Nkgono ho etsa hore letsatsi la hae la tswalo e be le ikgethang. Jwale kenya dintho tse ding tse tharo tseo o neng o ka rata ho di fa Nkgono
- hoja o ne o ka ya mmona ka letsatsi la hae la tswalo.

Mme Mamoeng o Thabisa Nkgono

Pale ka Joan Rankin • Ditshwantsho ka Tamsin le Natalie Hinrichsen



Setshwantsho

Kgetha karolo ya pale e se nang setshwantsho mme o toroye setshwantsho bakeng sa yona. Kopitsa mantswe a pale a tsamaisanang le setshwantsho sa hao kapa o kope motho e mong ho o thusa ho etsa jwalo. Kenyelletsa pale ya hao botlaseng ba setshwantsho sa hao.




Ho bala

Bala pale ka lentswe le phahameng o tsepamisitse mohopolo tseleng eo o bitsang medumo ya mantswe a kang *phaqa-phaqa*, *bobbity-bob* le *kete-kete-kete*. Kenyelletsa diketso tsa mmele tse tsamaisanang le modumo wa mantswe ha o ntse o a bua. Haeba o hloka motho ya tla o balla pale, kenella ha a bitsa medumo ya mantswe.



Ho ngola

Ngola lethathamo la dintho tsohle tseo batho ba leng paleng ena ba faneng ka tsona ho etsa hore mokete wa letsatsi la tswalo la Nkgono e be o kgethehileng. Jwale kenya dintho tse tharo tseo o neng o ka rata ho di fa Nkgono hoja o ne o mo etetse ka letsatsi la hae la tswalo.



Mosebetsi wa matsoho

Etsa karete ya letsatsi la tswalo la motswalle kapa setho sa lelapa se tla beng se keteka letsatsi la sona la tswalo haufinyane.

Tshebetso

Sheba setswantsho sa Valecia, Siphon le Mme leqepheng la 4. E mong le e mong wa bona o nkile eng? Fumana dintho tseo o ka di sebedisang ho etsa eka ke tseo Valecia, Siphon le Mme ba di nkileng. Leka ho tsamaya jwalo ka Valecia, hamorao ebe jwalo ka Siphon ebe hamorao e ba jwalo ka Mme ha o ntse o nkile dintho tse.

